

豫河志

于廷鑑署



中華民國十九年重印

豫河志

西平于廷鑑題

重印豫河志序

豫河舊無志也自民國八年吳君詠湘長河務而編輯迺始其書綜事隸物提綱挈領犁然爲治河之導師顧以斷代爲書勝國以前共和而後均付闕如於是陳君兩人繼起纂述復有豫河續志之編補缺拾遺厥功匪淺後先輝映蔚成巨觀以故治豫河者必先治是書而後得所依據以實施其方略洵要冊也惟陳志曾壽棗梨流傳較易而吳志以鉛字排印迄今數稔訪求已艱讀者憾焉于君鏡三蒞戩防之三月經營擘畫百廢具舉而行河之餘迺重印是書數百帙以事餉遺工既訖問序於余余代縮鄉符時虞隕越而河防水利則又經國大業爲夙昔所究心者因舉所見以相質曰吾豫爲黃河中游自大禹疏鑿後歷夏迄殷始患崩決至周定五年河以大徙而神禹之故道寢失沿及後世決潰頻仍豫災最劇雖水性之湍激無常亦人事之規畫未盡耳方今寰海交通歐西治河之書汗牛充棟其大要以循源疏治引水灌溉爲主注意水利而不偏重隄防適合於大禹利民之旨加以專門科學研求之精深日新月異有足資吾借鏡者故近世人士輒樂道之惟是銳志歐化而不復措思於固有之載籍則其失也亦與抱殘守缺無異誠取是編

以窮原委則必洞明史跡灼知變化之端參引西法曲盡疏鑿之利於以融會中外斟酌時宜使洪流順軌而崩潰無虞利用有方而泛濫不作始可與言治水矣于君聞之喟然曰是志也海內望治方殷儻得與當代賢豪息馬論道討論古今治績以企臻平成之上理豈惟永弭河患於無窮樂利且肇基焉詎非豫人之厚幸歟此則馨香所默祝者已越數日余迺綜其語意序而歸之中華民國十有九年七月陸渾李純如序

重印豫河志序

余偕凌廳長雲門會勘河工由柳園口抵鄭州周歷黃河南岸者累日既又奉督修之命仍與雲門偕而于君鏡三實筦河務對於勘修兩役孜孜贊畫無倦色並以河務專書存者甚夥乃慨然有重印豫河志之舉而囑余爲文序之余考有清一代河防經費歲糜數百萬而河決豫境乃至二十四次之多自河督裁改後領菱防者人選漸輕所需經費復削減幾盡而數十年來尙無決溢之患者何也磚石壩嵒屹立于驚濤濁浪中堪以捍禦一時且河身較廣尙能容盛漲而殺其勢也顧或以目前無事遂視河工爲緩圖則又不可夫作事宜謀于豫防患必慎於微涓涓不塞瞬成巨浸矣履霜不戒馴致堅冰矣河自三門以下地平土疏復無天然保障其水質多挾泥沙逐年淤澱高出地而甚多就使增高培厚以堤束水亦係治河下策究非一勞永逸之計倘再不知防範一旦橫決則挾建瓶之勢潰溢四出豫兗青徐盡淪澤國豈不殆哉此非過慮之言也試觀下南中汛八九堡及中牟下汛二三堡等處或則大河南圈逼近堤岸勢成坐灣或則大溜頂衝堤岸塌陷形成缺口危險已達極點其他次要工程暨例應歲修者証以河流靡定隨時隨地均

有發生危險之可能而帑金多欠料石無存修守皆不足恃舉數百萬民衆之生命財產盡委於不可知之天數而不加援手余誠不解其何說也今幸我同志籲呼於下我當局主持於上當軍書旁午之秋作水患預防之計植物力拮据之會供河工必要之需且所估修者純係石工雖多費在所不計以期保固於永久焉可謂念切民生知所先務矣而豫河志一書又於是時重印以廣其傳凡我同志尙其反覆研究黽勉進行思籌欸之艱難念大汛之險迫持以毅力勉辦事之認真本諸良心冀開支之核實庶幾大工早竣永慶安瀾爲我兩河造福無量也余因治河事重特假叙言發之以自勗而勗人至是志要旨前序論之詳矣茲故略而不論云中華民國十九年七月滎陽楚緯經序

重印豫河志序

豫河志爲吳詠湘先生所編次同於民國十一年冬曾爲序而行之并另編續志以爲徵實從事菱防者率奉以爲圭臬惟以鉛印無多得者爲難十九年春政府簡于鏡三先生長豫河初蒞任履勘隄工廢墜具舉亟擬重印豫河志若干部分散同人以爲趣事赴工之助來書屬爲之序同方在苦塊中安敢違斬衰唯而不對之義輕弄筆墨顧誼關桑梓未容緘默謹自託於識途老馬爲進數言夫黃河爲禍中夏四千餘年矣自神禹以降如賈讓王景賈魯潘季馴以及前清朱栗靳黎諸公相與焦心殫慮以畢其生除防導兼施外別無異能奇策是豈古人不及今人智哉誠以河自邛山下挾沙而行奇悍實具特性本標兩治其道不過如此也近五十年來厲行石工政策昏墊之患漸減亦成效之略可睹者豈非未然之防較逸於已然善因之工不減於善創歟第無事已久相與安之則亦相與忘之且相與厭之而思去之於是變法之說興焉夫法亦孰云不可變者顧必利害相十百而後可否則必另有確乎不敗之方足以取而代之而後可若云吾以徇時不計其他是直以瀕河千數百萬人的生命財產爲試驗場僥倖於一逞同實危之是志詳載例

案實自明以來治河之法之見諸實行者詠湘舉以詔示後世殆予人以可守鏡三此舉勞雖省於始作事尤便於善成其嘉惠於吾豫者至鉅斯皆不朽之盛業也已抑又思之各省諸行政廢署中央可以統一之制行之事同則職同也豫河情形特殊微獨與東南江圩海塘異即直魯河務亦容多不能強同之處是宜以完全地方制施之讀是志也當能知之敢舉以爲鏡三告并以告我豫人

民國十九年七月信陽陳善同序

重判豫河志序

秋浦周尙書之巡撫山東也余居幕職司河務尙書輯有治水述要一書復命余參考成案從事補輯每屆汎期隨節周歷各河益資印證嘗言治水之法必先考其源流察其經過利弊擇其善者而從之嗣余管理東豫兩河先後十年一本尙書之說略著成效民國六年來總豫河得見全河案卷有清一朝燦然備具蓋自改制以來曩者河督豫撫及各河道署之案卷悉萃於茲誠恐歲久散佚則將來無所考據因延攬通儒督集幕僚纂集豫河志若干卷信陽陳雨人先生爲刊行之余在事凡五年限於經費計畫諸事多未舉行其行者不過十之一二若減埽增壩若裁兵加餉若沁河改歸官辦若測繪黃沁兩河精密全圖皆拮据就緒而纂集豫河志其一事也近年東西諸國於土木工程之學一日千里吾國之習此者亦日出不窮倘能以新法修治各河一掃數千年之積患寧非快事乃時會多乖經費日絀僅能於昔日之成法畧事補苴爲苟且目前之計豈當事者之心哉余在豫之日即力言各河受病日深必須速修遲恐遺患忝官鄉邦更何顏以對父老乃去豫八年河安如昔不敢謂昔日之規畫遽能保全至今然不能不深佩於後之來

者維持之心亦良苦矣比得西平于鏡三先生來書謬承獎飾以豫河志昔印無多擬重刊徵序於余余弇陋不文摯意又烏敢拒昔周尙書輯治水各書自題絕句云山崩水竭理還在休問他年覆瓿無余竊慕其意始有是書之輯今幸陳于兩先生先後爲我印行他日文獻有徵皆兩先生之所賜也是爲序

中華民國十九年歲次庚午七月固始吳簣孫

重印豫河志序

昔仲尼論從政特許子貢之達蓋達則政理不達則政不理斷斷然也

廷鑑

不敏忝掌舌

豫河政自念服務桑梓歷有二十年雖嘗竭力殫心求達於治體而於河務究未服習譬如北人學沒悚惕在心是以受職以後遇河上老兵宿員罔不虛心諮訪尤思多搜言河載籍藉資考鏡以爲先事之師顧治河專書向不多見紀曉嵐先生全書目錄所載治水之書亦僅二十二種以漢桑欽所著水經爲最古酈道元水經注爲最詳嘗覽至晉司馬孚上表言興水利中有勿使稽延以贊時要二語而恍然於治河之道不外先時籌備臨時策應隨時糾察而已第防患與興利其法當有不同不達將何以籌備何以策應又何以糾察乎因念民國以來黃流無恙吾鄉先生之長此席而有聲者前有固始吳公簣孫繼有信陽陳公善同兩賢者皆河工所稱爲博達者也吳著豫河志陳著豫河續志篇章具在竊幸取則不遠乃檢閱架上續志存者雖夥豫河志則僅餘一部詢諸友朋告闕如者亦復十人而九嗟嗟是志經始於己未秋至壬戌春稿甫脫而吳去陳爲緇成其書當時紕於公帑鐫板無力乃鉛印若干部曾不數年而是書之存於河署者已如碩果倘不

續印并此孤本而再佚恐此後于役河干者披閱續志轉不知椎輪所自始矣顧或謂是志也但錄成案不過文書簿籍之細况近年科學發明河工亦日新月異有志者方研究埃及之治尼勒河美洲之治米西西畢河患除利興力求進化至於吾國所謂石犀銅龍水鍵隄柱以及籬竹糾芟諸法且將薄之以爲非一勞永逸之策則此區區詳案之書有無又奚關重輕不知是志專爲豫作斷代爲書自順治訖宣統二百七十年間黃河漫決凡三十九次而豫境至二十四次之多其經營補苴之迹開卷了然可爲殷鑑且此書類分爲五經費一門紀載尤悉旁觀者痛恨昔年河工積弊激而爲矯枉過正之論但言節帑不復顧及督工殊不知惜費誤工之爲害更烈鄭工用帑千萬事經四十餘年尙有談之太息者至乾隆間青龍崗之工堵築用欸至二千萬尤鮮有知之者矣則是志之堪備觀省非一端而已也由此考求掌故而更博採叢哲論河各書旁及各國治河新法斟酌損益以求適當未始非借挽狂瀾之一助爰請命大府籌資重印三百部以廣其傳非第彰吳陳兩公之美亦望吾儕同志相與殫沒以練達河政云爾是爲序

中華民國十九年歲在庚午仲夏西平于廷鑑謹序於河南河務公署

序

士大夫讀書稽古關懷梓桑凡名山大川之在其地者靡不博極羣書旁稽衆說精心研
覈辯謬訂訛以爲因革損益隨時考查之鍊証鳳豫人也黃河豫瀆也源雖發於崑崙然
禹貢導河由積石而龍門而華陰而底柱以至於孟津大伾道經豫境者最多其源流經
緯分合伏見以及疏濬啓閉波瀾蓄洩之法凡我豫人皆當因委窮源逐細研求藉以雪
數典忘祖之譏况職司河務者尤屬責無旁貸更未可以度外置之也顧吾豫自張清恪
公總督河道時著有居濟一得八卷附河漕類纂一卷探入四庫全書迄今二百餘年吾
鄉士大夫以著述鳴者固不乏人而河務專書竟付闕如斯亦豫省一憾事也河南河務
局自吳君詠湘來爲局長乃慨然有修豫河志之舉書成見示并囑爲文以弁簡端余盥
而誦焉除圖以外一源流次工程次經費與祀典終以雜著其體裁已詳凡例無容贅述
其宗旨則以彙輯成案借資考鏡爲主在實用不在空談誠爲河渠歷史上鐵板之主義
夫治河有成績而無定形查張清恪公所陳三禁三束四防八因諸條固皆躬親履勘事
事切於實用較之萬斯同河源攷薛鳳祚兩河清彙以及崔惟雅芻議或問等書條分縷

晰最稱詳賅惟水視地遷法隨時變神而明之存乎其人若必拘拘於簿籍文書之跡則刻舟求劍識者曰悞矣然若無簿籍文書之可憑竊恐書闕有間不特薦紳先生難言之即于役河干人員擗埴索塗茫茫無所據將何從而徵之且信之耶吳君詠湘爲吾鄉望族仕不廢學言有足徵綜計生平宦績由魯而豫從事戔防者十餘稔矣以故紀事纂言皆由躬行實踐而來絕非紙上之空談是志也實與居濟一得爲吾鄉絕無僅有之書余固不敢曰吳君學問經驗與鄉先哲清恪公相提而并論然就豫言豫就志言志搜殘補闕自順康以後之大經大法皆得并垂不朽後之人考已往之成規樹將來之遺範均於是志取法焉其有功於吾豫河防者豈淺鮮耶查河南通志向列河防一門余蒞豫後籌設全省通志局甫經開幕而是志適先告成足資甄採不禁先覩爲快而揭櫫之以餉同人庶可爲防河之一助云爾是爲叙安陽張鳳臺謹識於梁垣公署

序

嘗聞陸朗夫中丞請修河渠志之言矣曰有每歲經營之迹無百年不變之形昔人所編河渠諸書止就彼時事勢而言閱歷年歲遂多歧異不及今釐爲一書則後人考鏡無資蓋官運河道時所上在乾隆三十九年前後總督東河者實爲姚公立德當時雖然其說議修然卒未聞成書迨中丞以居憂按察使復銜命視運河乃自成備考六卷而別著河防要覽一書而皆非此書內所擬自雍正以來黃流之決塞運道之變更閘壩之廢置泉流之通塞官師之增并錢糧之盈絀及時追錄以上接全河備考治河方略行水金鑑諸編之說也

賁孫既領河隄之役連年行河之暇每欲考歷來遷變之由與夫前人之良法美意足以爲則倣之資者而不得其書著於世者皆南河諸書其中以行水金鑑爲最後然所載至康熙六十年而止河工之要者在成案則文書簿籍是已亦嘗於此求之然一事始末不能銜接者十常六七或乃僅有其名稱可稽其始末悉付之茫然者亦有之蓋自雍正二年前豫之黃河或統於南河或兼於豫撫而沁河則爲豫撫專司因其分也而兩不能全雍正二年以後既由副總河改爲總河名曰東河與南河劃然爲二專矣然

二百餘年蘭陽武陟濟甯開封總河駐所既不常厥居卒乃裁總河併於巡撫歲月既已久遠益以遷移之頻迭所謂文書簿籍則架閣之朽腐斷爛者有之交代之散亂湮沈者有之吏胥乘移轉之際隱沒居奇者尤不能免用是有所深懼而興纂輯之意計去朗夫中丞建議時又一百四十餘年而究不敢忘其言以爲及此時而爲之抱殘守闕固已是千百之十一倘復因循將並此十一之僅存者亦且不得而見一朝之大經大法敢以敝屣置之乎於是屬員司以鈔錄之事而貢孫繼而輯之先求之檔案其有不具者則編及他書兩年於茲粗得訖役書成名之曰豫河志誠知有如中丞所謂河東所轄開歸二道在黃河腰脊之間止叙一節全體不完然自銅瓦廂決口以後姑無論南河之久裁也卽東河總河所得轄者亦祇河南南北兩岸二百餘里之河雖使今日總河之職尙存亦祇能就豫言豫是編闕略之譏誠所難免要亦竭吾力矣吾力之所不能及者則亦付之無如何耳然如河南通志成於雍正十三年其河防一門於當時興建有關闕而未錄而今之補入者固自不少又如李觀察逢亨所修永定河志在嘉慶之時而於初建隄工及設官設兵諸原案已稱年久卷牘殘缺所甄錄祇百餘年間事而已如此况從二百餘年以

後欲在在原始要終不免感喟於書缺有間矣異日或有所獲當別成補遺一編誓心則然而未敢必其能操左券然自順治之初以逮光宣之時行河之大要略具於是矣循其涂而範我馳驅固三人之師也後之覽者毋亦諒此大輅椎輪之苦乎中華民國十年夏歷歲在辛酉仲冬固始吳寬孫序